

KE INI EKEDIBEREDE ỌKỌ EFEP

Job 1: 1-22; 2: 1-10; 13: 15; 23: 1-17; 27: 1-6; 42: 1-17

ỌYỌHỌ UKPEP-ŃKPO 372

Eke Mkpawara

IKỌ IBUOT “Edi Jehovah ọkọnọ, Jehovah onyūn ọbọ; ekọm enyīn Jehovah” (Job 1: 21).

Asua Nnyin

Satan edi asua nnyin. Enye ekeme ndiyo “nte lion eke okunide... oyom se editade” (1 Peter 5: 8). Enye ekeme ndikpuhọre idem esie nsin ke “angel uñwana” ndiñwana ndibiaña mme owo (2 Nwede Corinth 11:14). Enye ananam utom kpukpru ini. Enye esidomo ke usuñ kiet me eken ndidiañare nnyin ñkpọn Abasi. Enye enyene ifiok eti eti ke mme usuñ esie onyūn abiaña abiaña ñko.

Mme ini edu emi satan adade ido ñkari emi eyararede idahemi efiok ete ke edi abiaña. Enye esisin mme ukwañ ekikere ye ndisime ifiok ke ibuot mme owo. Satan ada mme owo eneni eneni ye mbon efen tutu mmọ enim nsu ke akpanikọ. Edi nnyin inyene nditi ite ke satan “edi osu-nsu ye ete nsu” (John 8: 44).

Satan enyene uko tutu enye odomo Eyan Abasi nko. Ke Jesus ama ọkọbọn akam onyūn etre udia ke usen aba ke Akai-ikọt, satan ama añwana ndinam Jesus anam uyo esie. Jesus ama ada Ikọ Abasi nte ñkpọ ekoñ añwana ye enye. Satan ama etiñ ikọ Abasi ñko ye idiok uduak ke esit esie. Ikọ akpanikọ emi etiñde ke idaha eke mikemke ye enye etie ukem-ukem nte nsu. Mme eñwọñ Abasi edi utibe ndọñesit, edi nnyin inyene ndida mmọ nnam ñkpọ ke usuñ emi Enye okoyomde nnyin ida inam.

Jesus ikọduhọ ke idomo satan. Inaha nte nnyin ñko iduọ. Abasi ananam akpaniko ye nnyin, idinyūn iyakke idomo eke okponde akan nnyin osim nnyin, ndien kpa ke ufọt idomo oro, Abasi eyesiak usuñ ubọhọ (1 Nwede Corinth 10:13).

Owo kiet-kiet enyene ndifiok ete ke eyedomo imọ. Ema edomo Jesus emi mikenamke baba idiok-ñkpọ, edi Enye ikọduhọ. Uwut-ñkpọ owo eñwen ọkọsọñde ada ke idomo edi Job. Enye ama enyene ata ediwak inyene inyene emi ekesinde enye “okpon akan kpukpru nditọ edem usiaha-utin.” Enye ama esibak edemere ke usen ubọk ndituak ibuot nnọ Abasi. Enye ama esibọn akam abañ nditọ esie onyūn awa mme uwa ọnọ Abasi ke ibuot mmọ kpukpru ini. Job ama “ọfọn ama,” abak Abasi, onyūn afara ke idiok; edi ema edomo enye.

Ke Ufọk Abasi

Usen kiet ke mme owo ekedade idem mmọ ekewut Abasi, nte emi nnyin isikade ufọk-Abasi, Satan ama edi ñko, edi ikedighe ndinam eti ñkpọ. Enye osuk ededi ke ufọk Abasi tutu ke emi. Enye anam nditowọn ye mkparawa edọn odu enyūn ebre mbre ye ñwede ikwọ, midighe ewet ñkpri ñwede nditimere mbon efen man ekubọ nti ñkpọ emi mmọ ekpebode ke mboho oro. Ndusuk ini satan anam mme owo ede idap ke ufọk Abasi, midighe, eti mmọ abañ ñkpọ efen man mmọ ekukop se ọkwọrọ-ikọ etiñde. Ke ini enode ikot ndibọn akam ke ñkpọ itie eseme, satan eyetiñ ye mme owo ete ke akpakam ọfọn mmọ ndinyọn ufọk sia eyo ọmọn okut, midighe, ke mmọ eyebọn akam ke ini ye ebiet efen. Yak nnyin ikpeme ke ikade ke ufọk Abasi mbak satan edibiaña nnyin.

Ebup Mbume

Abasi ama obup satan ebiet emi enye okodude. Satan ama ọbọrọ ete ke “ndiyọrọ ke ererimbot, ye ke ndiyo ke esit.” Enye ọkọyọhọ ye utom ke ndiyom mme ibak ndinam. Ke ntre, se enye eketiñde ekedi akpanikọ. Ndusuk ini satan etetiñ akpanikọ man otimere mme owo. Nso ekpedi ibọrọ fo, edieke afo ke ndusuk ini akakade ufọk Abasi ndien Abasi obup fi se afo akanamde? Nte afo okponyime ete ke imọ iketie inam mbubru ye ekpri eyeneka fo, nte ke afo ama otut utọn ye ete ye eka fo, midighe ke afo ama esin ntime ke ufọk ñwede? Midighe, nte afo ekpekeme ndidọhọ ete ke afo ama odu uwem ọnọ Jesus onyūn anam uñwana fo ayama, ñko ke emesiñwam onyūn ofọn ido ye mbon eñwen?

Ọkọ

Abasi ye satan ema eneme ebaña Job, owo emi akanamde ñkpọ Abasi. Satan ama ọdọhọ ete “Nte Job abak Abasi ke ikpikpu?” Enye ama ọdọhọ Abasi ete ke ọkọ ama akan Job okuk, oro edi ọkọ ukpeme Abasi.

Satan ndien ama odori Job ikọ ete ke Job ikpanamke akpanikọ inọ Abasi edieke ekpemenerede ọkọ oro efep. Ndiwut nte ke Satan ikenenke, Abasi ama odibede ọkọ oro efep. Edi ikonyimeke satan “otuk” Job ke idem esie. Edi akpanikọ ete ke Abasi akayak nkpo emi otibe man Enye ayarade owut Satan, Job, ye nnyin nko ete ke Abasi eyemum owo emi odude ke mkposon idomo akama.

Ntak-Urua

Emi edi usun emi satan akadade anwana ye Job. Usen kiet isun-utom kiet ama edi ke oto Job edidoho enye ete ke asua, ndito Sabea, ema etan mme enan esie emi edide iba-iba ke itie ikie ition kpa ye mme ass ikie ition. Mmo ema ewot ndito utom esie ke mibohoke kiet emi akadade etop emi edi. Mbemiso isun utom oro okure etop esie, kiet ke otu mme ekpeme-eron ama edi. Etot esie ekedi ndinam Job ofio ete ke ofuri eron esie emi ekedide 7,000 okoro ye mbon utom emi ekekpemede mmo ema ekpana ke mibohoke enye emi akadade etop oro edi okoboho ye uwem. Isun-utom efen ama edi ye etop nte ke mbon Chaldee ema edisuan kpukpru camel 3,000 emi Job ekenyenede enyun ewot mme andiwat mmo. Enye ikpon okoboho. Kiet ke otu mbon utom esie efen ama edi edidoho enye ete ke kpukpru ndito-iren esie itiaba ye ndito-iban esie ita ema ekpana ke oyobio. Ntre ntak-urua kiet ebe efen adiana! Nso utu nkpo ndighe ekedi emi! Nso utu ukut okomum Job!

Ndinam Akpanikọ

Ediwak owo enyene ntak-urua, mme idomo enyun esim mmo; edi nte akanam edomo owo kiet nte Job? Nso ke Job akanam ke idak mkposon idomo emi? Nte ido ekesidide, ndiwut mfuh esie, “Job awai ekura esie, onyun okporo ibuo esie, ndien oduo ke ison,” onyun atuk ibuo ono Abasi. Imonim ite idem ama akpa satan eti-eti. Enye okodoho ete ke Job eyesuni Abasi. Satan ikenenke, uduak esie ama onyun okpu ke ini Job okotorode Abasi. Job ama ofio ete ke Abasi okono imo kpukpru inyene ye edidion. Enye ama ofio nko ete ke imo idikemeke ndida mmo baba kiet nnyon ke ini imo idikpade. Enye akabat ete ke imo idi asana-utom ndikpeme nti nkpo oro adana nte Abasi onyime.

Odudu Eke Enyenede Adana

Abasi ama eti satan ete ke Job ama anam akpanikọ ke kpukpru idomo oro. Job ama aka iso “ofon ama.” Okposuk edi nte satan ama akanwana “ndisobo enye ke minyeneke ntak” onyun odomo enye man abiat ebuana esie ye Abasi. Job ama osono omum mbuotidem esie akama. Ekem satan odoho ete ke ukpuhore nkpo eyeda itie edieke Job edikerede ete ke imo imon ikpa. Satan ama odoho ete “kpukpru se owo enyenede ke owo edino ke ibuo uwem esie.” Oro ekeme ndidi ntre ke abana ndusuk owo, akpan-akpan ye mmo eke miboho erinya. Mmo efehe ndik ndisobo ye Abasi. Yak ikut se ikotibede ino Job.

Abasi ama onyime ete ke satan ekeme ndidomo Job adana nte enye miditukke uwem esie. Odudu satan enyene adana. Okposuk edi nte enye enyenede akwa odudu, odudu Abasi okpon akan. Ke ini Abasi onimde adana, satan ikemeke ndibe adana oro.

Mme Oyo

Satan ama otuhore Job. Ama ada oyo ofuk enye, ndien emi ekedi nkpo mbom ke enyin owo. Nwan esie ama okut nte itie esie odiodke. Enye ama odoho enye osuni Abasi onyun akpa mkpa, nte nkpo emi edohode ete ke baba idorenyin ikoduhe ino Job ke ikpohidem me ke spirit. Edi Job ikanamke idiok ke ndinam se nwan esie eketemede enye. Job ama etin se ikodude enye ke esit. Enye ama odoho ete “Nte nnyin ibo Abasi eti nkpo ndien idiboho idiok-nkpo nko?”

Mme Ufan Ita

Owo ita ke otu mme ufan Job ema edi ndidon enye esit. Mmo ema etie ye Job ke uwemeyo itiaba ye okoneyo itiaba esuk esese enye. Baba owo mmo itinke ikọ kiet. Ndusuk idomo enye emi nko ama okpon ukem nte ufen emi enye okobode ke ubiak oyo. Mmo ema enam kpukpru nkpo ke esiode efep “ndidon” Job esit. Mme ufan esie ita emi ema ekabare edi ufiet eno ererimbot: “Mbon idonesit Job” edi mbon emi edoride-dori ikọ utu ke ekop mbom.

Uñwam Itoho Mme Ufan Esie

Job ama eseme onyun ekere ete ke akpakam ofon imo ndikpa. Nte akanam oyo kiet oto fi? Ekeme ndinwana fi esisit nte enye okobode ufen ke ini enye ekenyenede oyo otodonde ke eka-ikpat tutu osim ke etin-ibuo esie. Okposuk edi Job okodude ke ubiak ye ke ukut, enye okowuk mbuotidem ye idorenyin esie ke Abasi. Enye ama odoho ete “sese, mme Enye (Abasi) eyewot mi: nnyeneke idorenyin edi nyekani ido mi ke iso esie.”

Mme ufan Job ikenyeneke baba uñwam kiet ino enye. Job ama odoho mmọ ete ke edieke mmọ ekpewoñorede eda itie imọ, ke imọ ikpañwana ndiñwam nnyuñ nsoñọ mmọ idem. Oro okpwowo ndidu nte ibet uwem etemedede: “Ntre sededi mbufo eyomde owo enam ye mbufo, enam kpa ntre ye mmọ” (Matthew 7: 12).

Inamke Idiok-ñkpọ

Job ama akañ idem esie ke mme ikọ emi mme ufan esie ekedoride enye ete ke enye ama anam idiok-ñkpọ. Enye ama odoñọ ete ke imọ imenen ke iso Abasi. Okposuk edi nte ema ekedomo enye ekesim adaña, ke ukut, ke ubiak, ke ikọ “mbon ndoñesit esie, Job ama ekpe ebire ndimum edinen ido esie ñkama. Job ama enyene udon ndika ke iso Abasi koro Abasi ama odoñọ se idide akpanikọ ke abaña idomo emi. Job ama odoñọ ete ke emi ekedi idomo ndien ke Abasi ama onyime ete osim imọ.

Ndusuk owo esikere ete ke ukut, udon, ye afanikon esidi ufen ke ntak idiok-ñkpọ. Idighe kpukpru ini ke emi esidi akpanikọ. Peter ama ewet onọ ndito Abasi: “Ndima, ekuyik ikañ-ikañ idomo eke odude ke otu mbufo, eke etienede mbufo man edomo mbufo efiok, nte edide utibe ñkpọ oworo mbufo: edi adaña nte mbufo ebuade ke ndutuhọ Christ, ekam edara; man mbufo ekpenyuñ edat esit eti eti ke adañemi ediyararede ubon Esie” (1 Peter 4: 12,13). Usen kiet ke ini Jesus osobode ye owo nnan, ema ebup Jesus ndidoñọ me anie akanam idiok-ñkpọ, owo nnan oro me ete ye eka esie. Jesus ama oboro ete ke baba kiet ke otu mmọ ikanamke idiok-ñkpọ, edi ke owo oro ekedi nnan man Abasi akpada ubon. Owo oro ama okop nsoñidem onyuñ onọ Jesus ubon.

Idomo Emi Owo Mikoduho

Ekedi ikọ-ntiense Job ete ke enye ama asaña ke usuñ Abasi, ete ke enye ama onim mbet Esie, ñko ke enye ama ekere ikọ-Abasi akan ata udia esie. Job ama odoho ete: “Koro enye (Abasi) ofiokde usuñ eke odude ye ami: enye odomo mi: nyeworo mbiet gold.” Nso oruk utibe-ñkpọ ke ekpedi edieke nnyin kiet kiet ikpeberede ndisaña mbe ke idomo ye utọ erikan oro! Job ama asaña ebe ke idomo edi enye ikoduho. Ke Job osuk ekerede abaña nte Abasi okponde kpa ye odudu Esie, ama añaña enye nte owo ekpride. Job ama atua mkpofio abaña mfaña esie. Job ama anam eti, ikanamke idiok. Enye ama oboñ akam abaña mme ufan esie ita emi miketiñke akpanikọ.

Abasi ama odoñ Job utim ikaba akan nte enye ekenyenede ke akpa tutu mme ukperedem usen esie ekabare efon ekan. Nte afo emekere ete ke ama ofon ye Job ke enye ndinam akpanikọ ye Abasi?

MME MBUME

1. Nso idi ntak emi ekedade Job nte enye emi “okponde akan kpukpru ndito edem usiaha-utin”?
2. Anie ekeka ke ufok Abasi ndibioñ utu ke ndituak ibuot nno Abasi?
3. Nso ke Abasi ekasin akanare Job okuk ndikpeme enye?
4. Satan akanam nso ke ini ediberede okọ mfep?
5. Job akanam nso ke ema ekebo enye kpukpru se enye ekenyenede?
6. Okowut nso ke ini Job mikanamke nte satan okodoho?
7. Satan okotuhore Job didie?
8. Nso idi ntak emi mme ufan Job ekedide?
9. Didie ke Job akasaña ebe ke udomo esie?
10. Nso ke Abasi akanam onọ Job ke ini udomo esie okurede?